



# KRISTIAN THALAI

Kristian Thalai Pawl  
Chanchinbu  
Thla tin chhuak



Volume XIII NO.11 | February 2023

RAWNGBAWLNA AWMZIA

*Lalenglana Hrahse*

HRINGNUN KAWNG  
(HAN DAWN VE TEH)

*Centenary C. Lalsahawma*

KOHRAN HNATHAWH TIHPUITLIN

*Lalvenbimi*

KAN THATNA TURIN REM  
MIN RUATSAK THIN

*H. Lallminghlui*

THALAIT SUANGTUAHNA-

KTP LEH RAWNGBAWLNA

*Zoramchhani*

KTP ROREL INKHAWM  
VAWI 10-NA PROGRAMME



An Chanchin-  
OLIVER GIROUD  
*C. Lahnunglinga*

NANG LEH MIDANG

*Lalhruaitluanga Renthlei*

-THU THILTIHTHEIHNA-

*T. Upa R. Lallungmuana*

ROREL INKHAWM NEIHNA TUR - ZEMABAWK BIAKIN





January Ni 14 khan One In Christ Member 2023 hlanne neih ah hruaitute min sawm angin an tel pui.



Khatia Bial KTP Silver Jubilee ah Hruaitute leh Synod Choir.



January Ni 2022 Leitan South Branch ah Leadership Training neihpui in T. Upa Lalbiakthuama leh Pu Lainunsanga, KTP Committee Momberte an kal.



January Ni 30 (1hawhtan) zanaah Phunchawng Branch Silver Jubilee hmanpuin hruaitu thenkhat te leh Synod Choir te sawm an nih angin an hmanpui.



Tawngtaina inpui kawt chei that mek.



Phase II Convention Centre tur. Stucture peih vek tawh a ni.

# KRISTIAN THALAI PAWL CHANCHINBU THLA TIN CHHUAK

Chhuah tan kum : 1970 | Kum 53-na | Kuminah wawi 2-na | Chhuah tawh zat : 531

**Editor** : Malsawmdawngliana

**Joint Editors** :

T. Upa Robert Lalrinawma

Rinsailova Sailo

F. Lalremruata

P.C. Lalthanmawia

C. Lalkhawngaiha

F. Lallianzuali

**Manager** : Lalrinngetha

**A lak man** :

Kum khatah : ₹ 100.00

Copy khat : ₹ 9.00

*Thu chhuah tûr nei chuan Editor, Kristian Thalai, Synod Office-ah thawn tûr a ni a; a la duh chuan KTP Office-ah a man pêk lâwk a ngai.*

**Manager's Mobile** : 9856804149

**E-Mail** : [kristianthalai1970@gmail.com](mailto:kristianthalai1970@gmail.com)  
[centralktp@gmail.com](mailto:centralktp@gmail.com)

## KRISTIAN THALAI PAWL

### Thupui

Rawngbawl tûra chhandam

### Thupui inngahna

Ephesi 2:10 : Thil tha ti atán Krista Isuaah chuan siama awmin, ama kutchhuak kan ni si a, chu thil tha tih chu kan awmna tûrin Pathianin a buatsaih lâwk a ni.

### Thil tumte

1. Isua Krista rinna leh amah anna kawnga thalaite hruai.
2. Kohhran kut ke ni tura thalaite buatsaih.
3. Kohhran hnathawh tihpuitlin.
4. Krista Chanchin Tha puan darh.

## A CHHUNGA THU AWMTE

- |                                                                                        |    |
|----------------------------------------------------------------------------------------|----|
| 1. Editorial                                                                           | 2  |
| 2. Sermon – Thu thiltihtheihna – T. Upa R. Lallungmuana                                | 3  |
| 3. Article – NEICC Youth Fest 2022 Report<br>– C. Lalkhawngaiha, Central C/M           | 5  |
| 4. Article – Rawngbawlina awmzia – Lalengliana Hrahse                                  | 7  |
| 5. KTP Rorel Inkhawm wawi 10-na Programme                                              | 9  |
| 6. Kan thatna turin rem min ruatsak thin– H. Lalhminghlui                              | 12 |
| 7. An chanchin – French Footballer ropui Kristian rumrut<br>– Giroud - C. Lalnuntlinga | 15 |
| 8. Thalaite suanguahna – KTP leh rawngbawlina<br>– Zoramchhani                         | 18 |
| 9. Article – Hringnun kawng (Han dawn ve teh)<br>– Centenary C. Lalzahawma             | 22 |
| 10. Article – Kohhran hnathawh tihpuitlin - Lalvenhimi                                 | 24 |
| 11. Article – Nang leh mi dang - Lalhruaitluanga Renthlei                              | 27 |
| 12. Hruaitute chanchin – Lalruatfela, C/M, CKTP                                        | 28 |
| 13. Hruaitute chanchin – F. Lalremruata, C/M, CKTP                                     | 29 |
| 14. Hringlang Tlâng                                                                    | 30 |
| 15. Kantu – Chawngtlai Branch                                                          | 31 |
| 16. Keimahni                                                                           | 32 |

## PAHNIHNA NIH THIAM



Bial KṚP Conference kan zo a, Bial leh Branch hmalakna tur tam tak kan rel chhuak leh ngei awm e. Kan hmaa chanvo tla leh mawhpurhna te hlen zel thei turin i infuih thar sauh sauh ang u. KṚP-te pawhin kum 68 kan lo tling ve dawn ta reng mai a, hruaitu leh member ṭha tak tak, Kohhran tana mi ṭangkai leh ban rinawm tak tak mi eng emaw zat a lo chher chhuak tawh a, a la chher chhuah belh zel dawn bawk a ni.

Tunlai khawvel - a ṭha ber, a langsar ber nih loh kan thiam lohna khawvelah hian KṚP member-te chuan he kum tharah hian a a langsar lo zawka awm thiam kan zir a pawimawh hle awm e. Hruaituten chanvo hrang hrang an ruatah mawhpurhna hlen theih loh ṭum a awm ṭhin a, heng hunah hian a aia mi dang inruat a ṭul hunah mi aia ruat nih hreh deuh tlatte pawh a awm theih viau awm e. Heng hunah tak hian Isua hnung zuitu, eng dinhmunah pawh awm thei KṚP kan nih a ṭul hle a ni.

Isua zirtirte khan an zingah ropui ber tu nge ni ang tia an inzawh lai khan Isua chuan an zinga ropui ber tur chu an rawngbawltuah, a chhiahhlawhah a awm tur thuin a chhang a. Lal Isua'n he khawvelah rawng a rawn bawl ṭan dawn khan Baptistu Johana chuan rawng a lo bawl mek tawh a, Isua chungchang a sawinaah “Ani chu tlatlum tur a ni a, kei erawh chu lâng tur ka ni” tiin ama chanchin a sawi a ni.

Kan rawngbawlnaah hian mahni chauh indah pawimawh lovin mi dang tana kawng kiantu, an chak lohna laiah ṭawngṭaipui a, fuihtu leh zirtira kaihruaitu ni tura ṭan kan lak a ngai a ni.

Khawvel thil - min chimtu nuam tak tak, kohhran leh KṚP-a inhman aia nuam zawk a awm mek a, a lo la chhuah belh zel ang. Hetiang a lo thlen hunah pawh hian KṚP hian hma a sawn zel theih nan ṭhangtharte tana kawng sattu, mite fuih phur a, tar lang a, hniam zawka ṭan a ngaih chang pawha ṭha taka titheitu, hnung dawl thiam KṚP member kan mamawh hle mai.

Kan ṭhian leh ṭhalaipui, KṚP-a rawn inhmang tharte tana fuihtu, an hnunga kal a ngaih chang pawha kal thiam nih i tum ṭheuh ang u.

T. Upa Robert Lalrinawma  
Joint Editor



# THU THILTIHTHEIHNA



## Sermon



— T. Upa R. Lallungmuana

**T**hu hian thiltihtheihna a nei, a tidam thei a, a tina thei, a tihlum thei a, a tinung thei, a fuih thei a, a tihnual thei, a tungding thei a, a tichim thei bawk. Thu avangin nupa an inthen thin a, thu avangin chungkua an keh chhe thin. Thu avangin miin hna an chhan a, an thu hriat avangin miin hlimna nei lova inhriatna leh mahni inhmuh hniamna an nei thin. Thu hian thiltihtheihna a neih vangin kan thusawi turah kan fimkhur a ngai.

Tuma'n lei hi an veng zo lo Pathian puihna atang lo chuan, kan lei veng zo tura tawngtai thin kan mamawh. A chhan chu thinrima thu tha lo tak tak sawi kan ching thin, kan buaina lam hi kan sawi nasa em em a, Pathian thil tih lam kan sawi taw lo hle, Davida chuan Goliatha a hmuh khan a lenzia leh a ralthuam ropuizia a sawi lo, Pathian thil tih ropuite a sawi zawk, "Savawm-te ka that a, Sakeibaknei-te pawh Pathianin min puia ka that zel, tu nge Goliatha chu? Saw serhtan loh pa saw maw? Ka hlau ve hleinem," a ti. Hmelma pa ai chuan Israel-te Pathian kha ropui a ti zawk. Thil chhe lam zawk tuipui riau ringtu kan tam

mah mah a, Pathian zarah ka ti thei ang tih lam aiin, 'a ngaihna a awm tawh lo' tih kan ching thin hi thil tha lo tak a ni. Zawlnei Isaia chuan a chhe lai siamthatu an ti ang che min ti a sin. Tuna kan tawn mek harsatna chauh kan sawi kan sawi a, Pathianin thil min tihsakte hre chhuak a, sawi zawk tur kan ni. I harsatna tawn mek atanga chhuak thei tawh lo ang maiin enga ti nge i ingaihl tlat? Hei vang hian mi tam tak an intihlum asin; i chhuak thei tih ka tiam a che, a chhan chu Pathianin i tawrh theih bak i chungah eng mah a thlentir dawn lo tih a sawi a; tin, thlemna i tawh laiin tlan chhuahna a siamsak zel bawk

che a ni, ka thei lo ti ringawt zel suh, i theih lohzia lam thu hlir i sawi chuan nangmah leh nangmah i intichau tulh tulh a ni mai. Min tichaktu Kristaah chuan engkim ka ti thei tih tawngkam hi kan hmang thin tur a ni. Pathian chuan min kalsan dawn lo tih min tiam a; chuvangin, engkim hi amah nen chuan kan ti thei tih i puang hmiah thin zawk ang u.

Rinna ka nei ti thin mah ila hlauhna leh beidawnna lam hlir sawi fo si ila, kan rinna chu eng nge a tangkaina awm ang? Harsatna sawi miah loh tur tihna a ni lo va; mahse, a chhan tha tak awm lova harsatna sawi reng mai ringtu nih hi a tha lo kan tihna zawk a ni. Lal Isua chuan harsatna a tawh laiin eng mah a sawi duh lo, Beram no a hmul mettu hmaa a ngawi reng ang hian, ani pawhin a ka a ang lo” a ti. Harsatna tawh lai te, hun khirh tak tawh lai tea thiam thu sawi vak vak hi Isua tih dan a ni tlat lo nia maw le. Harsatna sawi reng ai chuan ngawih pawh a tha zawk, report tha lam sawi hi kan tan chakna a ni. Number

Bung 13 kan en chuan Kanaan ram enthlatu lo haw lehte kha chi hnihin an rawn inthen phawk mai a, thenkhatte chuan report tha lo lam an tuipui zawk a, a beidawnthlakzia an sawi ngar ngar a; mahse, lehlam group chuan eng mah hlauhawm an hmu ve lo. An kalna a inang vek si a, an thil tawn a inang vek baw si a, enga ti nge thu inang lo an rawn hriat chu le! Khatih hun lai pawh khan keini zawng khau ang lek kan ni titute kha thlalerah khan khau ang lekin an thi zo ta vek a, kan chaw tura Lalpa min pekte an ni titute erawh chuan chaw atan an ring tak tak a ni. Kan tunlai khawvel pawh hi chutiang chu a ni, a dik tak chuan Chanchin Tha lo sawi tur a tam lutuk, keini chuan Chanchin Tha lam zel tuipui zawk ang u, Chanchin Tha chuan min ti huai a, min ti chak a, min ti nghet baw a ni; chuvangin, kan thu sawi hi a positive hle zawk tur a ni.

“Depression ka nei a” tih reng loh tur, Isua pawh kan nei a, chu zawk chu sawi thin tur a ni.

**KRISTIAN THALAI**

**FEBRUARY 2023**

**Cover Design : H. Lalruatsanga,**  
Durtlang North Branch

# NEICC YOUTH FEST 2022 REPORT



— C. Lalkhawngaiha  
Central KTP Committee Member

NEICCYA Youth Fest 2022 chu November Ni 23 & 24, 2022 chhung khan Union Christian College, Umiam Khwan, Ri-Bhoi District, Meghalaya-ah neih a ni a, Programme ruahmanna ang angte tluang taka hman a ni.

## NEICCYA Youth Fest:

NEICCYA chu North East India Christian Council Youth Assembly tihna a ni a, India hmarchhaka Kohhran hrang hrang thalai pawlte inzawmkhawmna a ni ber mai ang chu. NEICCYA-ah chuan Kohhran thalai pawl hrang hrangte chu Unit tih a ni a, State pakhat atang pawhin Unit eng emaw zat a awm thei a, Mizoram atang pawhin Kohhran thalai pawl hrang hrangte kan tel mek a, NEICCYA hnuaiah hian kan zavaiin Unit 41 kan awm mek a ni.

NEICCYA hian Biennial Conference a buatsaih thin a, kumin hi Biennial Conference neih loh kum a nih avangin Youth Fest kan hman ta thung a ni.

## Palai:

Youth Fest 2022-ah hian NEICCYA hruaitute bakah, Unit tin atangin palai 4 intirh theih a ni a; amaherawhchu, harsatna leh chhan hrang hrang avangin palai kal kan thahnem lem lo va, Unit 14 atangin palai 56 kan tel. Keini KTP lam atang chuan Unit palai 4 bakah, CKTP-a kan hruaitu hlui, tuna NEICCYA Vice President ni mek T. Upa Malsawmtluanga

nen kan vaiin mi 5 kan kal a, Unit palai mi palite chu – Central Committee Member aṭangin Pu Lalruatfela, Tv. Rinsailova Sailo, Pu C. Lalkhawngaiha leh Veng hnuai Bial aṭangin Nl. C. Zonunmawii te an kal a ni.

**Hun hman dan:**

Youth Fest-ah hian thupui zir, Group Discussion leh Variety Programme-tein hun kan hmang ber a, tunlai khawvel mi lar rawngbawl dan tur leh khawvel kan thlir dan turte mi thiam tak tak hnen aṭangin ngaihthlak a nih bakah sawi hona ṭha tak neih a ni. Kan thupui ngaihthlakte leh Resource Person-te lo tar lang ila.

***‘Youth Leadership in the Church’***

- Rev. Dr. Ramengliana, Secretary, NEICC

***‘Youth and Evangelism’***

- Rev. Dr. G.B. Pohshna KJP Synod Mihngi

***‘Youth Politic and Society’***

- Rev. A.I. Kharshiing President, NEICCYA

***‘Youth and Social Media’***

- Rev. MeyuChangkiri, NBCC

***‘Youth and Human Sexuality’***

- Dr. Karen Lalrindiki, NEHU

Zan lamah Variety Programme hun hmangin Unit tin aṭangin Special Item hmuhdawm leh ngaihdawm tak tak ngaihthlak a ni.

**A thlengtu lam:**

Youth Fest 2022 kan hmanna hmun hi Union Christian College Campus-ah a ni a, he College hi NEICC ta a ni hrim hrim baw a, a hmun a nuamin a fel fai a, a thlengtu lamin min dawngsawng ṭhain min vil hneh em em a, ei leh in lam pawh a tuiin kan tlai ṭhin hle.

Youth Fest neih chhungin Pathian zarah harsatna lian tham kan tawh lo mai ni lovin, Krista zara kan unau hnam hrang hrang, hmun hrang hranga mite nen hun nuam tak kan hmang thei kha a ropuiin a hlawk hle a ni.

NEICCYA Biennial Conference waw 19-na hi May Ni 19-21, 2023 chhungin Central KṭP thlen turin Durtlang Kohhran Biak Inah neih tura ruahman a ni.



# RAWNGBAWLNA AWMZIA



— Lalenglana Hrahse  
New Serchhip Branch

**R**awngbawl tura chhandam tih thupuia hmangtu Kristian thalai Pawlte hian rawngbawl awmzia hi kan hre chiang meuh em le? Ephesi 2:10-ah chuan ‘thil tha ti tura siam’ kan nih thu kan hmu a, heta ‘thil tha’ a tih hi rawngbawl a ni a, chumi ti tura siam chu kan ni. Tichuan, keini KTP-te chauh ni lovin, ringtu/piangthar zawng zawngte hi rawngbawl tura chhandam kan ni vek a, rawngbawl hna thawktu – rawngbawltu kan ni vek tihna a ni.

Rawngbawl chu eng nge ni ta ang le? Bible-a Isua rawngbawlnate kan en chuan mi dang tan vek a ni tih kan hre theuh awm e. Nang leh keia tan a nun hlan thakin a rawngbawl a rawn hlen a nih kha. Inkhawm, tawngtai leh Bible chhiarte hi ringtu nun than len nana thil pawimawh ber berte an ni a, heng thil tha taka ti tlattu chu rinna kawngah pawh a thang lian mai thin. Amaherawhchu, chung a thil tih hlawkna chu amahin a tel avang pawh a ni ang; Kohhran chuan, mi a inkhawm taihmak avang ringawtin Rawngbawltu nihna a pe ngai lo a ni. Kohhran huang chhunga rawngbawl naah ‘Rawngbawltu’ a tihte chu mahni

tan ni lo va, mi dang tana thawk/che chhuakte an ni. Sunday School zirtirtu chuan Zirlaite tan thahnem ngai takin a thawk thin a, hei vang hian Kohhran pawhin Sunday School zirtirtu hna thawktu chu Rawngbawltu nihna a pe reng a ni. Chutichuan, rawngbawl chu ‘Miin Krista a hriatnaa mi dang tana a thil tih’ tiin kan sawi thei ang.

Rawngbawl hi ‘mi mal rawngbawl leh huho rawngbawl’ tiin kan then hrang thei ang. Mi mal rawngbawl hi a pawimawh em em a, a huam zau hle baw a ni. Officer-in a hna rinawm taka a thawh hian chu chu a

rawngbawl na a ni – mi dang tan a nih avangin. Chutiang zelin inhlawhfa mi pawhin amah chhawrtute hmuh loh lai pawha tha taka hna a thawh chuan chu chu a tan rawngbawl na tho a ni. Revival Speaker-te leh thusawitu tam takten ‘Biak In kan chhuahsan chiah hian kan rawngbawl na a in tan chiah a ni’ an tih thin ang zawng zawng kha he mi mal rawngbawl na hian a huam tel vek a. Tin, heng bakah hian Kohhranin Pathian rawng a bawl na tihlawhtling tura chanvo hrang hrang min pekte kan tihhlawhtlinna pawh hi mi mal rawngbawl na vek a ni.

‘Huho rawngbawl na’ kan tih chu eng nge ni ve ta ang le? Mi tinten tum thuhmun neia rawngbawl hna kan thawh hona hi *huho rawngbawl na* tiin kan sawi thei ang. Mi mal rawngbawl na kan sawi tak ang lo takin huho rawngbawl na chuan tum leh tih tur a nei sa vek bawk.

Huho rawngbawl na zinga langsar ber leh lian ber chu Kohhran hi a ni. Kohhran hnapui ber chu Chanchin Tha hril a ni a, Kohhranin chumi a tih chu Pathian rawng a bawl na a ni. Kohhran chuan a rawngbawl hna a hlen theih nan Kohhran

chhungah rawngbawltu a ruat thin bawk. Chutiang zel chuan KTP leh pawl dang dangte pawhin tum leh tih tur nei sa vekin Pathian rawng an bawl a. Chung an rawngbawlnate tihlawhtling tur chuan hruaitute neiin chanvo hrang hrang kan lo insem ta thin a, huho rawngbawl na chhungah chuan mi mal rawngbawl na hna kan lo thawk ta thin a ni.

Huho rawngbawl na chuan tum leh tih tur a nei sa vek kan tih tawh kha. Jharkhand Mission Field-a thawkte hnapui ber chu Santal hnamten Pathian an hriat nana Chanchin Tha hril a ni. He field-a thawk tu emaw hian Santal-te vei lovin Assamese emaw Bihari-te hnena Chanchin Tha hril tum tlat ta se, Jharkhand Mission Field rawngbawl na chuan a tlak hniam phah ngei a rinawm. Chuvang chuan huho rawngbawl naa chanvo nei ten kan duh dan leh ngaih dan ngawtin rawngbawl hna kan thawk thei lo tih kan hriat theuh a pawimawh hle ang.

A hniak hnung kan zui - Lal Isua’n min hnutchhiah rawngbawl na hi hre chiang ila, thahnem ngai takin Lalpa rawng i bawl zel ang u. Rawngbawl tura chhandam kan ni si a.

**KTP ROREL INKHAWM VAWI 10-NA**

**A hmun : Zemabawk Kohhran Biak In**

**A hun : March 3-5, 2023**

**MARCH 3, 2023 (ZIRTAWPNI) ZAN**

6:30 pm – 7:00 pm : Zai ho

**7:00 pm : PALAI LAWM LEH REPORT INKHAWM**

Hruaitu : Pu L.V. Lalthantluanga, Asst. Leader

***KTP Kum puan hawn leh hlanna***

Hlantu : Upa B. Lalhmunliana  
Secretary (Sr), Mizoram Synod

Reports : 1. General Secretary Report  
2. Finance Secretary Report  
3. Bial Report khaikhawmna

Zaipawl : 1. Mizoram Synod Choir  
2. Melriat Bial  
3. Chawlhmun Bial  
4. Mission Vengthlang Bial

**MARCH 4, 2023 (INRINNI)**

**9:30 am – 4:00 pm : ROREL INKHAWM**

Hruaitu : Rev. Dr. F. Pachhunga  
Leader, CKTP

**MARCH 4, 2023 (INRINNI) ZAN**

6:30 pm – 7:00 pm : Zai ho

**7:00 pm : PATHIAN BIAK INKHAWM**

Hruaitu : Pu K. Lalfakzuala  
Committee Member, CKTP

Thuhriltu : Upa Rochungnunga

Zaipawl : 1. Mizoram Synod Choir  
2. Sialsuk Bial  
3. Nursery Veng Bial  
4. Keifang Bial

**8:45 p.m. : FELLOWSHIP**

Hruaitu : Pu Lalnunsanga  
Committee Member, CKTP

Thu sawi tawi : Pu H. Rosangzuala  
Committee Member, CKTP

Special Items : 1. Zuangtui Bial – Group zai  
2. Hlimen Bial – Short Play  
3. ITI Veng Bial – Male Voice  
4. Chanmari West Bial – Shadow Play

**MARCH 5, 2023 (PATHIANNI) CHAWHMA**

9:30a.m.–10:00a.m : Zai ho

**10:00a.m. : PATHIAN BIAK INKHAWM**

Hruaitu : T. Upa P.C. Vanlalnunmawia  
Treasurer, CKTP

Thuhriltu : Rev. Dr. C. Chawngminglana  
Moderator, Mizoram Synod

Zaipawl : 1. Mizoram Synod Choir  
2. Dawrpui Vengthar Bial  
3. Ramhlun North Bial  
4. Luangmual Bial

**MARCH 5, 2023 (PATHIANNI) CHAWHNU**

1:00p.m.–1:30p.m. : Zai ho

**1:30p.m. : PATHIAN BIAK INKHAWM**

Hruaitu : T. Upa Lalbiakthuama  
Committee Member, CKTP

Thuhriltu : Rev. Dr. K. Lallawmzuala  
Executive Secretary, i/c CKTP

Zaipawl : 1. Presbyterian Choir, Lunglei  
2. Chawnpui Bial  
3. Ramhlun Bial  
4. Venghlui Bial

**MARCH 5, 2023 (PATHIANNI) ZAN**

6:30p.m–7:00p.m. : Zai ho

**7:00a.m. : PATHIAN BIAK INKHAWM**

Hruaitu : Upa F. Zoherliana  
Finance Secretary, CKTP

Thuhriltu : Rev. Dr. F. Pachhunga  
Leader, CKTP

Zaipawl : 1. Mizoram Synod Choir  
2. Venghnuai Bial  
3. Ramthar Veng Bial  
4. Zemabawk Kohhran

**8:45p.m. : FELLOWSHIP**

Hruaitu : Tv. C. Lalbiakmawia  
Committee Member, CKTP

Thu sawi tawi : T. Upa Robert Lalrinawma  
Committee Member, CKTP

Items : 1. Trio – Top 3, Praise On  
2. Kulikawn Bial – Live Band  
3. Electric Veng Bial – Fak lam  
4. Bungkawn Bial – Biblical Play

**Note:**

1. Zai hruai hi a thlengtu kutah dah a ni.
2. Sound System hi a thlengtu kutah dah a ni.
3. Pathianni Chawhma leh Zan inkhawmah thawhlawm lak khawm a ni ang.
4. YRC pualin thawhlawm bawm hun a ni ang.
5. Fellowship-ah hian zai hona hun a tam thei ang ber hman ni se.

# KAN ṬHATNA TURIN REM MIN RUATSAK ṬHIN



— H. Lalhminghlui,  
Dinthar Vengthlang Branch

*“Tin, Pathian hmangaihtu, ama ruat anga a kohvate tan chuan, an ṭhatna turin engkimin a thawhsak hlawm ṭhin tih kan hria” (Rom 8:28)*

**M**ihringte hriat phak rual loh Pathian rorel dan hi ngaihtuah chian poh leh hriat thiam a har a, kan pawm thiam erawh a ṭul si. Ringtute chuan chu chu thil pawimawh tak leh ringtu nun tak kan neihna a ni ngei ang.

**1. Vuivai lova a remruatna pawm thiam:** Kan mihringpui te, kan chhungkua, kan rawngbawlnaah te pawh a ni ang vuivai duh tan chuan vuina tur hi a awm ṭhin awm e, tu mah mi fel sa, famkim thlap kan awm si lo va. Amaherawhchu, theihtawp chhuaha inzira pumpelth theih erawh tum ila a ṭha awm e. Davida nunah khan han en ila, Jesaia chhungkaw ropuina niah khan a fa tlum ber Davida kha a telh ve ta miah lo mai a, mihring lam taka

thlir chuan Davida tan hian a van rilru nat thlak dawn tak em! A fapate zawng zawng Israel ram lal ber ni tura a interview lai khan Davida chu beram a ventir a nih kha. Kei ni ta ila ka lungawi lo viauin ka ring. Ṭhenkhat pheih chu kan titau anga, an kohnaah pawh hian kan kal duh tawh lo mai thei. Mahse, Davida chuan lungawi takin a pawm zawk a ni. Lo thinrimin, phunnawi vel ta se Israel lal atan hriak thih a ni kher dawn em ni? Keini ho hi chu kan



phunchhiarin vuina tur hi kan zawng hma thin. Enga ti nge kei kher, enga ti nge hrehawm tuar tur hian min lo piantir ve kher le tiin kan indawm kun fo thin. Mawhpah tur kan zawng vak vak a, a tawpah Pathian kan dem leh ringawt mai thin a, hei hi kan sim a ngai, harsatna kan tawhna phenah hian eng nge a thil tum hi tiin mahni kan inzawh ve hi a ngai thin, amah kan auh hnem theih nan hmanruaah a rawn hmang a ni tih hi i hre reng ang u.

## 2. Pathian dem loh tur:

Harsat manganna, dinhmun chhe bera kan awm changte pawh a awm thin ang, chung thil kan tawhte chu chhuanlama hmanga Pathian kan hawisan fo a nih chuan kan inen fiah a ngai hle ang. Kan chung a thil thlengte hi a fair lo bik riaua hriatnate pawh kan neiin kan hriat chang pawh a awm ang, a chhan chu mihring kan ni miao a. Pathian kan dem a, a

awm tak tak lo a nih hi, awm ni se ka dilnate pawh min chhang ang chu tiin mahni inkhawngaihna nen vuina leh thinrimna nen kan tlukna ngaiyah kan tlu leh mai thin a ni.

Amaherawhchu, Pathian dema sawi chhiat nghal ngawt ai chuan kan chung a thil lo thleng ah hian eng nge zir tur ka neih, ka harsatna tawh te hi Pathian hian chhan leh vang awm lovin a thlentir ngawt dawn lo a ni tih hi kan hriat a pawimawh hle a ni. Hla siamtuin “Beidawnna leh lungngaihna tawh chang ni lo thleng mah se, ka Lalpa remruatna danah chuan a hmel mawi min hmuhtirtu” a tih ang khan kawng engkimah kan thatna duhtu hian harsatna kan tawh hi a phal zia Joba nunah pawh kan hmuh kha. Chuvang chuan eng emaw hlekah Pathian dem leh a laka lungawi loh kan ching fote hi sim a tha khawp mai.

**3. Harsatna kan tawhte hi kan thatna tur a lo ni zawk fo:** Hringnunah hian harsatna leh chhiatna, hrehawmna leh lungngaihna kan tawk fo va, hengte hi kan tana thatna zawk a ni tih hi pawm a harsa thin a ni. Pawm mai ni lovin rin a harsa thin. Kan chhungten min thihsan a, chu lai karah kan tana tha tur zawka Pathian remruat a ni ang e tih hi a hun lai chuan kan pawm thei lo, tun thleng pawh hian kan pawm hlei thei lo a, kan hre thiam kher awm lo ve. Kan nunah hian chhiatna leh harsatna kan han sawi bak hi tam tak kan tawk fo awm e. Mahni nunna lak duh hialna te, chhungkaw harsatna mi dang hriat ve lem loh kan tawrh chang te pawh a awm ngei ang. Chung zawng zawngah chuan Pathian hnenah tlu lut a, ka thatna tura min ruatsak a ni ang e tiin a hnen pan zel thin ila a duhawm hle ang. Kan hre thiam vek kher lo a nih

pawhin pawm thiam tawp hi a pawimawh hle a ni. Rom 8:28 - a kan chhiar tak ang khan keini ringtute tan chuan a pawimawh hle. Kan chung a lo thleng tam takte hi a hun lai chuan kan hre thiam lo fo thin tih kan hriat a duhawm hle a ni. Sam 119:67-68 ah khan, *“tihrehawma ka awm hma khan ka vak bo thin a; Tunah erawh chuan i thu ka zawm ta. Nang chu i tha a, thil tha i ti bawk a; I thuruatte chu mi zirtir ang che”* a tih ang khan heng lungngaihna leh harsatna kan tawhte hi tawk lo ila chuan Lalpa kan Pathian hi kan vah bosan fo hian ka ring thin. Duh taka a siam mihringte hian a hnen kan pan theih nan harsatna kan tawh min phalsak a ni tih hi kan hriat reng a tha a ni. Min au la ka chhang ang che titu kan Pathian hnenah hian i tlu lut zel ang u, Ani chu kan damna a ni si a.

Lalpa'n a thu malsawm rawh se.

## FRENCH FOOTBALLER ROPUI KRISTIAN RUM RUT - GIROUD



— C. Lalnuntlinga,  
Salem Veng

*K*helh hmain khelmualah ka ṭawngṭai ziah ṭhin a, goal ka khung zawhah pawh ka ṭawngṭai leh ziah bawk ṭhin - Giroud

Football ngainatute chuan French Footballer ropui-Olivier Giroud-a hi kan hre lar viauin a rinawm. Chutih rualin Giroud-a hi Kristian rum rut mai a ni tih erawh kan hre tel kher lo mai thei.

Giroud-a hi tunlaia Football khel mek zingah chuan Kristian ṭha ber zinga chhal ngam a ni hial ang. A hming pawh Olivier Jonathan Giroud ngat a ni. Tun ṭumah hian Kristian Ṭhalaite tana entawn tlak Giroud-a chanchin tawi kan tar lang dawn a ni.

Giroud-a hi kum 36 leka upa, KTP member rual a la ni. Chambéry, France rama piang, ram tana vawi 118 khel tawh a ni. Goal 53 zet ram tan a khung tawh a, France Footballer zawng zawng zinga ram tana goal khung hnem ber a ni. Tunah hian AC Milan (Serie A)-ah a

khel mek a. Club hrang hrang a zawm tawh aṭangin goal 258 zet a thawk chhuak tawh! Football lama a sulhnu ropui tar lan sen a ni lo.

### **Pian hma aṭanga harsatna tawh Giroud:**

Footballer ropui Giroud-a hi a nun a tluang purh bik lo. Harsatna leh buaina hrang hrangin a tlakbuak ve nasa hle. Chung zinga mak tak mai pakhat chu a pian hma aṭanga harsatna a tawh chu a ni!

A nu leh pa hian Giroud-a hi nei turin an inruahman lo! Mahse, a nuin a pai miao si. A nu leh pate chuan tihtlak (abortion) an tum rilru hial! “Ka nu pum chhunga ka awm lai aṭangin dam khawchhuak turin ka bei ṭan tawh a ni,” tiin kum 2021-a ‘The Times’ in an kawmnaah a sawi hial.

A nu pawhin an tum hauh lohva piang a nih thu a hrilh. Mahse, titla lovin a nu hian a pai puitling a, hmangaih leh duat takin Pathian thu nen a kaihruai a. Christian Footballer ropui hi kan lo hmelhriat theih phah ta a nih chu!

### **Kristian rum rut Giroud:**

Giroud-a nu, Viviane-i chuan a fate hi an naupan lai, London-a an awm lai atangin Giroud-a leh a unaupa (a u) pakhat chu Biak Inah a hruai thin a. Pathianni apianga inkhawm thin an ni a, Protestant Evangelical Kristian an ni nghe nghe. “Ka nu hian Pathianni tin Biak Inah min hruai thin” tiin Giroud-a hian a sawi. A naupan tet ata a nuin Pathian lama a hruai tlatna rah chu mi hlawhtling a nih hnu pawhin Giroud-a nunah a bet tel tlat a ni kan ti thei ang.

Giroud-a hian Isua hi a zahpui lo mai ni lovin a chhuang em em zawk a. Isua chanchin leh ringtu a nihna hi a tam thei ang ber tar lan a tum zawk thin. Ni tin Bible chhiar thin a ni a, chu chuan a nunah hlimna a thlen thin thu a sawi.

Kum 2018-a FIFA World Cup champion, France Team-

ah pawh khan telin, “Sakhuana ngai urhsun mi ka ni a, Pathian hnenah lawm thu ka sawi e. Ka duhthusam hlawhtlinna chang theia ka awm hi ka va lawm em! Ka tan chuan ni tin mai hi malsawmna ni a ni,” tiin a lo sawi hial tawh.

Giroud-a hian a rinna tar lan hi nuam a tih zawng tak a ni a, a ban ding lamah Latin tawngin, “Dominus regit me et nihil mihi deerit,” tih a chhu a, chu chu ‘Lalpa chu mi vengtu a ni a, ka tlachham lo vang (Sam 23:1)” tih a ni. Covid hripui len nasat zual lai, kum 2020 pawh khan Online-a Pathian thu zirna ‘Alpha Learning Course’ (UK) zawmin a zir zo nghe nghe.

Kum 2019 khan French Christian Magazine, ‘JESUS’ chuan an chanchinbu kawmah, Kum 33-a upa, Isua kum zat tiin Giroud-a thlalak tar langin, an kawmna hi an lo chhuah tawh bawh. France ram ropui, Pathian ngaihsakna kawnga tla chhe em em tawh karah pawh Giroud-a hi Pathian tana ding tlat mi a ni.

Chelsea-a a khelh lai, 2018-2021 pawh khan Kristian tihduhdah tuar mekte tanpui nan vehbur an khawnsaknaah theihtawp a lo chhuah tawh a.

“Football nen chuan inlaichinna a nei lo; mahse, Biak Ina ka inkhawmnaah Kohhranten min lo ngen a, vehbur khawnpui tura min beisei angin theihtawp ka chhuah a ni, engkim tha takin a kal thei e,” tiin a sawi.

Chelsea a chhuahsan dawn khan Inter Milan leh Everton zawm tura sawmna a dawng tel, Mahse AC Milan a thlang ta zawk. “Pathianin Milan-a awm turin min ti a ni. Pathian chuan ka nunah hian ruahmanna fel tak a nei a ni” a ti. ‘Ka rinnain AC Milan zawm turin thutlukna min siamtir a ni’ ti ngam ngat, Pathian rawna tawngtai thin; Pathiana innghat tlat nun neitu a ni.

*‘Ka theihna apiangah ka rinna hi sawi chhuah zel ka duh a. Sakhuana ngai pawimawh em emtu ka ni e’* tiin a sawi a. A sawi angin Football khelmuala a tawngtai lai hmuh tur a awm fo va, A theihna apianga Pathian hming lam thin leh a theih ang anga nunpui tlat tum mi a ni bawk.

Kum 2020 khan a chanchin leh a rinna a puanchhuahna lehkhabu, ‘Always Believe’ (Ring tlat rawh) tih chu a lo tichhuak tawh bawk. A lehkhahuah hian, “A chang

chuan ka nuna thil thleng thenkhat hi a dawnawn thiam har ka ti ve thin; mahse, hma lam pan turin ka ke pen min tibahlahtuah ka hmang ngai lo. Pathian chuan ka nun kawng engkimah hian ruahmanna fel tak a nei a ni tih ka ring tlat,” a ti.

FIFA World Cup 2022 khelh zawh takah khan Kristian rum rut Giroud-a hian France ram tan Goal 4 ngawt a thawk chhuak a, Bronze Boot a dawng. Tar lan tawh angin France ram tana goal khung hnem ber nihna hauh mektu a ni zui ta a ni.

“Chawimawi la, anin a chawi sang ang che; I lawm chuan zahawmah a siam ang che” (Thufingte 4:8) tih dikzia Giroud-a chanchin atang hian kan hre thei. Footballer ropui, mi dangte fuihtu, Isua tana pasaltha leh huaisen hian Pathian a chawimawi a, Pathianin Football hmangin a chawimawi let a ni kan ti thei ang.

A chanchin ngaihnawm tak tak tar lan tur tam tak a awm, tar lan kim sen loh khawpa chanchin ropui nei, Rinnaa ding nghet a ni. Giroud-a nun atang hian entawn tur kan va ngah em, Rinna kawnga min tichaktu atan Giroud-a chanchin hi i hmang ang u.

# KTP LEH RAWNGBAWLNA



— Zoramchhani  
Chanmari Branch

*M*zoram hmun hrang hranga Kristian Ṭhalai Pawl member zawng zawngte leh chhiartu duh takte kan LALPA Isua Krista hmingin chibai ka buk a che u.

## 1. KTP:

KTP hi Krista leh a Kohhran ban rinawm ni tura Pathianin a Kohhranho kaltlanga a din a ni tih kan hriat chian phawt a ngai ka ti. A hmasa berah chuan KTP-a kan active na na na chuan miin min en hniam thei lo, KTP active member kan nih ringawt pawh hian mi pangngaih min siam a ni. KTP active member ni tur hian mi bik nih kher a ngai lo va, mi lar nih kher a ngai lo va, lam thiam emaw zai thiam nih kher pawh a ngai lo. KTP active member ni tur hian qualification ngai ta se, kan fel vang emaw, kan hmeltat vang emaw, kan pian nalh vang emaw, kan hausak vang leh kan thiamna san vang ni dawn se tu mah KTP active member ni tura tling zo kan awm lo vang. Mahse, Pathian khawngaihna avang liau liauin keini ṭhalaithe hi KTP kaltlangin

rawngbawl min phalsak a, rawngbawl na hun remchang min siamsak hi kan vannei em em a ni.

A khawngaih rawngbawl hna thawk tur hian khawpui mi nih emaw, thingtlang mi nih emaw kher a ngai lo va, kan awm ang ang hian khawi hmunah pawh awm ila ṭhalaiten khawngaih rawngbawl hna kan thawh theih dan ṭha ber chu KTP-a inhman hi a ni. “Pathian tan hian ka theih tawp kan chhuah teh ang” tiin mahni ṭhahnem ngaih ang angin han thawk chhuak ve dawn pawh ni ila KTP-a inhman emaw Kohhran belh bak hi kawng dang a awm chuang lo. Pathian hi ka tih ṭhat duh vanga ropui a ni lo va, ka tih ṭhat duh loh vangin a ropuina a tlak hniam phah chuang lo va. Ka tel lo hian a ropui sa em em a, chumi kara keini ṭhalaithe a rawngbawl min phalsakin

rawngbawl thei tura hriselna tha min pe a, rawngbawl theihna hmun KTP min pe ringawt pawh hi kan vannei hle a ni.

## 2. KTP leh Social Media:

Chanchin Tha avang liau liaua tun dinhmun thleng thei kan ni e, an ti thin. Sap Missionary-te kha lo kal lovin Chanchin Tha minrawn thlen ta lo se tun dinhmun hi kan thleng kher ang em tih pawh ngaihtuah tham fe a tling a ni. Chumi avang chuan changkanna leh kan Kristianna hi a kal kawp tlat a ni ti ila kan sawi sual awm lo ve. Tunah phei chuan internet hian min phuar khawm hneh tawh em em mai a, Mizoram kilkhawr tak maiah pawh hian khawvel lehlama thil thleng kan hre ve nghal zel thei tawh mai bakah, hmanni lawka thil chhuak thar pawh arawn thleng ve nghal thei tawh zel a, internet hi kan nunphung pawimawh tak pakhat a tling a ni.

Tunah chuan in tinah TV kan neih vek tawh bakah thalaite phei chuan Smart Phone kan hum fer fur tawh a, kan mut hmun atangin kan duh duh kan ti thei a ni ber tawh a. Chutih lai kara Biak In leh kan in a inhlat a nih phei chuan inkhawm tura insiama Biak In han pan vang vang chu thil chakawm leh phurawm zawk zawk a ni kher

lo vang tih ka ring. Keimahah ngei pawh a ni fo va, a tam zawk hi kut hnathawk kan nih ve tho ka ring a, hah zual chang phei chuan fai tawka inbual a, mu chung phone han khawiha TV han en mai mai chu a chakawm ve fo vang. Amaherawhchu, kan chak lai chauh te, kan phur lai chauh te, kan peih lai chauh te, Kohhran hlim lai chauh te leh KTP programme a nawm lai chauh tea Pathian rawngbawl tur kan ni lo tih hi mahni kan inhrilh nawn fo a tul a ni. Matthaia 16:24-ah chuan *“Tin, Isuan a zirtirte hnenah, tu pawhin mi zui a duh chuan mahni hrehawm pawisa lovin a kraws puin mi zui rawh se,”* a ti a, Pathian hi a nuam chinah leh kan peih chinah chauh zui lovin, thil nuam zawk tam tak kalsana amah zui turin ORDER min pe a ni.

## 3. Thilpek rawngbawlina:

Thilpek rawngbawlina hi Kristiannaah chuan a pawimawh berte zinga mi a ni awm e. Kristiante kan bul tanna pawh thilpekah a ni a, Pathianin a fapa mal neih chhun min pe nghal phawt a, keini pawh thilpek pe uar turin min zirtir a, hla siamtu chuan, *“Pe rawh u; tichuan, pekin in awm ang, pekah Pathian in hneh ban thei*



*lo vang*” a ti a, Thufingte 3:9-10-ah chuan, “*I sumin Lalpa chawimawi la, i thil lo pung hmasa ber zawng zawngte nen, tichuan i buh in chu a lo khat liam anga, i sawr khur uain tharin a luang liam ang,*” tih kan hmu a ni. Keini KTP member-te tan chuan thilpek rawngbawl na hun remchang tak chu Faith Promise hi a ni a, kan theih ang tawh, phak tawh leh kan tlin tawh ang anga thilpek rawngbawl na kan neih theihna a ni a, KTP member-te chuan kan theih tawpin kan ngaih pawimawh a tha hlein ka hria.

Thilpek pe turin min ti a; mahse, min rulh leh tur thu Bible-ah hian tam tak kan hmu a ni. Phut let neiin thilpek rawngbawl na hi ti lo mah ila kan phak tawka kan ngai pawimawh a nih phawt chuan Amah zawkin min rul let leh dawn tih chiang takin Bible-ah min hrilh a, KTP member-te kan vanneihna a ni. Inkhawm thawhlawmah leh Faith Promise-ah eng zat nge in thawh thin ka hre lo va, mahse ka sawi ve duh chu, chhungkaw dinhmun inang lo tak tak, a mi mal ang zawng pawha thawh chhuah inang lo tak tak te, a tam zawk pawh kut hnathawkte pawh in nih ve nuk ka ring a. Amaherawhchu, thilpek

rawngbawl na kan tih hian, kan pek tam lam leh kan pek tlem lamah hian kan biak Pathian hi a buai lo tih kan hriat chian a tha a ni. Marka 12:42-43 a kan hmuh ang khan, hmeithai khan a neih chhun tangka dere pahnih a thlak a; mahse, Isua khan a neih zawng zawnga thilpek rawngbawl na a hlan kha mi hausain a neih chuangliam aanga a pek aiin a tam a ti zawk tho. Chuvangin, keini pawh hian Faith Promise emaw, kan inkhawm thawhlawma kan neih tawh leh kan phak tawh Pathian tana phal taka kan hlan hian Pathian mit hmuhah chuan a tam em em tho a ni.

#### 4. Zaipawl rawngbawl na:

Kan Pathian hi fak tlak a ni a, fak ngei tur kan ni. Fakna chungchang hi Bible-ah tam tak kan hmu a, fakna kan sawi ruala tel ve ziah chu zai hi a ni. Zaipawl kaltlangin kan vanglai tak hian Pathian fak turin ka sawm che u. Mi tam tak ngaih dan tha lo deuh chu, zaipawla tel ve turin ka tling lo emaw, kei chu ka zai thiam si lo, solfa ka thiam lote kan ti thin a. Pathian faka zai tur hian mi tling nih emaw, zai thiam emaw solfa thiam kher nih a ngai lo va, kan nih ang anga kan fakna hi Pathianin min pawmsak a ni. Sam 150:6-ah khan engtin nge

a tih, “*Engkim thaw thei tawh phawt chuan Lalpa chu fak rawh se, Lalpa chu fak rawh u,*” tih kan hmu a. Pathian fak tura qualification chu “thawk theih” hi a ni. Kan thawk theih chhung chuan Pathianin amah fak turin Order min pe a, a huhova Pathian fak theihna kan neih that ber chu Zaipawl hi a ni.

### 5. I hlu a ni:

Tunlai mite hi a upa ber atanga a naupang ber thlang hian rilru no tak kan nei vek a, chu kan rilru no chu Setana hian rawn hmanq tangkaiin, mahni inkhawngaihna sual te, hlutna nei ve loa inngaihna sual te, a tam awm e. Hengte hmanq hian min bei nasa em em a. Depression, Anxiety, Stress thil tam tak nei anga inhriatna ten min bei a, chu chuan thatchhiatna te, rilru hrisel lo te min puttir nasa em em a, hei hi a huatthlala tak zet a ni. Pathian chuan nang leh kei hi hlim turin min duh a, min hlut tak zet a; chuvangin, a fapa Isua Krista min pe a, sual bumna avanga kan boral mai tur phal lovin a fapa Isua Krista chuan Kraws ah kan tan a nun a hlan a nih kha.

Kan hun kal tawhah khan sual langsar emaw langsar lem lo emaw pawh lo ti tawh mah ila, kan vanneih em emna chu kan

Pathian hian kan hun kal tawh ni lovin kan tun hun hi a lo duh tlat zawk a, tun hunah hian nang leh kei hi **‘kal la, ti sual leh tawh suh’** tiin a ngaihdamna kan chang theuh hi a va ropui em! Hlim taka awm hi i phu a, ka tan i hlu a, kan tan i hlu a, i chhungkua leh khawtlang, kan ram tan i hlu a, chung zawng zawng ai chuan kan Pathian tan hian i hlu a ni.

A tawp berah chuan Thuhriltu 11:9-a kan hmuhah khan *‘Thalaite u, in that lai chen ula, in la naupan viau lai hian hlim rawh u, amaherawhchu Pathianin in chungah ro a rel dawn tih hre reng ang che u.’* tih kan hmu a. Bible-a kan hmuh angin kan thatlai hun chen phalsak kan ni. Keini Kristian Thalai Pawlte hian engtin nge kan thatlai hun hi kan chen dawn? Pathian khawngaihna leh zahngaihna, a hmangaihna vangin Kum 2023 kum bul kan tan leh ta, kumin chhung hian keini Kristian Thalaite hian Krista leh a kohhran tan kan that lai hun hi i’n chen hle mai teh ang u aw.

He kum hi i tan, in chhungkaw tan kum tha a nih ngei theihna turin LALPAN malsawm vek che u rawh se.

## HRINGNUN KAWNG (Han dawn ve teh)



-- Centenary C. Lalzahawma  
Vathuampui Branch

Engkim tana hun ruat a awm ang hian, hringnunah lei mîte tán hun ruat a awm thìn. Mihringte nunna leh thihna inkár chu pên khat leka hla a ni a; nimahsela, Síamtu'n chu pên khat lek chhúng chuan hun chi tinréng mai min zawhtírín min pal tlangtúr thìn.

“Thil hluite chu a ral ta a; ngai teh u, a lo thar ta,” tia Bible-a kan hmuh ang khán, hnah hluite chu òl zovin hnah tharin a rawn thlák a; nimahsela, a kung erawh a ngái reng thìn. Nunhlui a liam a, nun tharin a rawn thlák a; nimahsela, kan mihring taksa erawh a danglam chuang lo. Hruaitu hluite chu hruaitu tharin an rawn thlák a; nimahsela, an páwl hming erawh a ngái reng thìn. Khawvêl thil zawng zawng a inthlák danglam reng a, Síamtu erawh a ngái reng a, a danglam vè ngái lo. Síamtu rópùizia leh hringfate nun nêpzia hi hringnun hlimthlá hmu thiam tán chuan hmuh hmaih chí rúal a ni lo!

Mi tinte hi kan lo pìan chhuahna a inang lo va, thenkhat chu mi hausa chhúngkua aṭanga lo piangin, thenkhat erawh mi rethei tak chhúngkua aṭangin.

Mi rethei tak chhúngkua aṭanga piang a, nu pum chhúng atā sual sâa piang bawk tán chuan Job-a anga làwm thu sawi reng a harsa hle ngèi ang. Mi thenkhat nu leh pate kawng sial sâa awlsam taka nun kawng an zawh láiin, thenkhatte erawh chuan kawng an sial chawp a lo ngái a. Bul ṭanna a inan loh miao avàngin kawng engkimah kan thlen chin a inang lo fo. Chu chu hringnun kàlphung a ni miao si a! Mahsé, thlen chin aṭanga hmasâwn zêl tura síamtu sìam kan nih avàngin beiseina nèn hma lam kan pan a tûl thìn.

Mi tin mai hian kan sulhnu leh nun hlui ngáiin ní kan hmang ral a; mahsé, hma lam hun atán kan inbuatsaih lâwk thìn. Chu chu khuanu'n hringmi léng, dam chhúng khawsak ngaihtuah reng renga ni tin hun hmang tûrte tána dùan a ni. Kan dinhmun azirin hringfate hi khawvêl pakhata

chìng sìin kan khawvêl hi lei vãn a danglam tluk zetin a danglam a, a inthlau hle. He khawvêl hi mi hausate khawvêl a ni a, sum leh páiin ró a rèl miao avàngin dikna chungah meuh pawh rórélta a ni. ‘Sum ngah hi hlimna ber a ni lo’ mîte’n ti thìn mah sé, sum ngah apiang an hlim thìn si a nih hi! Chu chu hringnun khuarèl a ni miao si a!

Chul tùra dùan hringfate hringnun kalkawngah hian — nu pum chhúnga kan awm láai hun te, nausên nih hun te, naupang nih hun te, tleirâwl leh rãwlthar nih hun te, puitling nia nula tlangvâl nih hun te, nu leh pa nia pitar putar nih hun te a awm thìn. Chùng hun zawng zawngah chuan thihnain thla a zâr reng a, ni tinin múal kan liam thìn. Thihna hi rãpthlák hle mah sé, hringfate thátna tùra Siamtu remruat a ni. Thihna hi awm lo sé, kum upa tawh mi tam tak, mahnian eng mah ti thei tawh si lo, éi lova awm thei baw si lo enkawlin mi zawng zawng kan buai ang a. Èi leh bârah kawngah leh thil dang tam takah harsatna kan tâwk ngèi ang. Thihna hi hringfate tána Siamtu malsàwmna rópui tak a ni.

Mihringte hian vànglái hun bîk kan nei theuh va; nimahsela, chu hun chu chapòna tláng chhîpa siamtu fiahna harsa ber kan hmachhawn hun a ni. Chu kawng zawhtute tam zâwk

chuan fiahna an pal tlang zo lo fo. Chu kawng zawh thleng theitu chu mi rópui tak an ni a, fiahna pal tlang thei ngat pheih chu an rópui lehzuai. Fiahna pal tlang zo lo mi tam takte hi an demawm loh. Siamtu’n mî zawng zawng hriata min chàwimàwi hian, ‘mahni theihna leh thiamna avànga chu dinhmun dîng thei chu kan ni’ tia rilru chapòna neih hi thil harsa a ni lo reng a ni. Eng anga hmél thà, pian nalh, hausa, lâh leh rópui pawh ni ila, chapó thei kan awm lo. Nu pum chhúnga atã saruaka piang leh kut ruaka kan zalna tùr thlàn thim pan leh mai tùr kan ni tih hi hriat reng tùr a ni. Hringnun kawng kan zawh tán dân leh kan zawh tàwp dân hi mumang lama kan thil hmuh thín nèn a danglamna a awm meuh lo a ni.

Hringnun khawvêl, hmàn láai mîte tána khawvêl hlui tawh tak kha, naute piang hlim tán chuan khawvêl thar a ni. Kan nun kawng zawh tàwp hun tùr hre lovin mi tam takin nun kawng zawh tánin mi thenkhatin kan hun tàwp lam kan pan a, thi mai tùra inngái lah chùng zingah chuan pakhat mah an awm si lo. Chuvàngin, kan dam chhúnga ní te chhiar dân tùr kan thiam theih nán kan ‘HRINGNUN KAWNG’ hruaitu atán hruaitu ‘ARSI (ISUA)’ hi thlang ila. Zan thim hnuaiah pawh kawng dik kan zawh thei ngèi ang.

# KOHRAN HNATHAWH TIHPUITLIN



Article



– Lalvenhimi,  
Tumpui Branch, Kolasib

Chanchin Tha Matthaia 16:18-ah chuan “Tin, nang Petera i ni tih ka hriattir a che. He lungpui chungah hian ka Kohhranho ka rem chho ang a, Mitthi khaw kulh kawngkharte chuan chu chu an ngam lo vang” tih ziak kan hmu a. Hei hi Isuan hun rei tak he khawvela rawng a bawl hnu, a hun hnuhnung lama a sawi a ni. Tawi tein ti hian sawi dawn ila, Kohhran chu Lal Isuan ama tana a din, amaha innghatin a din a ni a, a thisena a lei, Krista mo ni tur leh Thlaraua Pathian chenna tura din a ni kan ti thei awm e.

Pathian kohna avanga a hnam pum ang emaw, aiawh mi eng emaw zat lo kal khawm, pung khawm te chu Hebrai tawngin **Gahal** tih a ni a. Hei hi Thuthlung Thar lamah Greek tawngin **Ekklessia** tih a ni, hei hi Kohhran tih tawngkam lo chhuahna leh tobul, Thuthlung Thar Kohhran leh hlimthla anga ngaih theih leh sawi thin chu a ni tiin kan mi thiam zawkten an sawi thin. Kohhran chu thlarauin a awm reng avangin Pathian thu dik tak a pawm a, Chanchin Tha hril tura nun leh Pathian chu a laipuia dah tlat thin a ni. Lal Isua hnathawh tihpuitlin hi a tum lian ber a ni. Naupangte kaihruaia, nun

kawng dik an zawh theih nana kaihruaitu pawimawh tak a ni a, chatuan nunna kan chan theihna tura zirna in pawimawh tak, chaw tak Pathian thu kan lakna pawimawh tak a ni.

Kohhran hnathawh tihpuitlin kawngah thalaiten eng ang takin nge mawhphurhna kan neih? Kohhranah hian thalaite tu mah tel duh lo ta ila, chu Kohhran chu Kohhran chak lo tak a ni ngei ang. Thalai chakna Kohhran apiang chuan engkimah hma a sawn a, a nuam thin a ni. Kohhran hnathawh hrang hrang kan sawi takte khi a puitlin nan chuan tar leh kum upate kutah dah mai theih a ni lo va, kan tel lo pawh hian Kohhran chu awm

theih tho mah se a hnathawh tipuitling tur chuan thalai tha chak rual, rilru leh ngaihtuahna hmang thiam, zirtirna kawngah te, Kohhran vawn thianghlamna ah te, a laimu ber Chanchin Tha hrilna kawngah te, thalai te kan chet loh chuan Kohhran hnathawh a puitling tak tak thei lo tih hriain thalaitein tan i la ang u.

Tizawng hian sawi leh lawk teh ang, Kristian Thalai Pawl member-te hi Kohhran huang chhunga awm, Kohhran tha tichak tura din a ni a, kan rawngbawl na hrang hrangah pawh hei hi Kohhran hnathawh dan a ni em tih kan thlir tel fo a pawimawh. Thalai thil tiha phur tak, Kohhran hminga chet chhuah huna che leh duh miah lo, mahni nuam tih zawng leh chak zawng ang chauha ruahmanna siam thin, Kohhran rawn nachang hre miah lo thalai rual kan nih chuan engtikah mah Kohhran hnathawh kan ti puitling thei ngai lo vang. Hemi atana pawimawh deuh deuh kawng thumin sawi teh ang :

1. Chung lam hriatpuinaa din Kohhran hnathawh tipuitling tur chuan danglam ngam thalai nih a ngai. Biak In leh a vel chauh hi Kohhran rawngbawl na a ni

lo va, ni tin kan eizawnna, kan nunah miten Kohhran hnathawh tih min hriat theih nan danglam ngam ang u.

2. Kohhran hnathawh tihpuiltinna kawngah thalaite kan inzir peih a ngai. Kohhran awmzia leh a hnathawh pawh hre lo va, ruat kan nih avanga ti ve mai mai kan nih chuan hma kan sawi ngai lo vang. Chuvangin, Kohhran kalphung hi zir Chiang zel ang u.

3. Mi thatche tan Kohhran hnathawh a tihpuiltin theih loh. Peih lo chung a tih hram a ngaih chang a tam a, chak lo chung pawha kal luih a ngaih chang a awm, kan duhnaa rawngbawl tur chauh hian Pathian leh Kohhranin min dah lo va, a hnathawh a puitlin theih nan chung lam rinchhana kan tih hram hram a ngai thin.

Keini thalai rualte hian Kohhran tha tichakin a hnathawh tipuitling tur hian mawhphurhna sang tak kan nei a, awm mai mai thei kan ni lo. Thalai kan nih chhungin kan that lai chen a phal a, kan lawm a phal a; mahse, Lal Isua hnung kan zuina kawngah a duh dan ang ngeiin he leia ama din a Kohhran hnathawh tipuitling turin theitawp i chhuah ang u.

# NANG LEH MI DANG



Article



– Lalhruaitluanga Renthlei  
Hunthar Branch

**N**ang leh mi dang inkâr hi chîk zâwkin i ngaihtuah ve tawh ngai em? Mi tin hian mahni lam aţang theuhin inngaih dân tâwk, inen dân tâwk kan lo nei vek mai. Mi dang sual kan ti ang bawkin mi pawh hian sual min lo ti ve a, mi chhûngkua kan duh khawp lo ang bawkin kan chhûngkua pawh hi min lo duh khawp lo ve bawk. Chênpuî harsa kan tih ang bawkin chênpuî harsa min lo ti ve tho va. An chêtzia kan chîk ang bawkin min lo chîk ve a, dawh hrâm hrâm nia kan inhriat ang bawk hian mi dangte pawh hian min dawh hrâm hrâm niin an lo inhre ve tho nia maw le! A châng pheî chuan, “*Ka dawh tawh dâwn bîk lo, ka hre thiam ngun tawh, ka ngaidam tawh lo vang,*” tiin kan chungchâng thu hi an mut hmunah te, an hnathawh pah tein an lo ngaihtuah ve vak vak thîn tho nia, keini pawn kan tih fo thîn ang bawk hian!

Chutiang mihring awm khâwm chu engtin nge ţa tak leh inngeih tlâng taka kan khawsak ho reng theih ang? A pawimawh hmasa berah chuan, mi dangte tâna phurrit tling khawp mize chhia neih loh tum phawt mai tûr a ni. Inngeih tlâng taka kan khawsak ho reng theih nân, hêng a hnuaia thupui hlâwm thum hi i han ngaihtuah zui teh ang.

## Mi dang ţa zâwka ruat:

Mihring awm khâwm hi inngeih taka awm khâwm reng theih a ni lo. Mi pahnih chauh awm dûn pawhin buaina tawh châng an nei. Buaina a awm hian mahni hi thiam zâwk niin

kan inhre tlat a, mi dang thiam lo zâwk niin kan hre vek thîn - tute pawh hian. Chutiang mihring awm khâwm kan nih avâng chuan mi inngaitlâwm apiang nun a nuam thîn. Mahni aia mi dang ţa zâwka ruat tûra zirtîrna pêk kan ni a, chu zirtîrna anga kan awm chuan mi dangin ţa, fel, inngaitlâwm min ti mai thîn. Mahni aia mi dang ţa zâwka ruat thiam apiangte hi mi nihlawh, chênpuî nuam, nun ngainatawm nei an ni thîn.

## Phuba la suh:

Thuthlung Hluchia chuan ‘*ha aiah ha, mit aiah mit*’ tiin an inzirtîr thîn a. Thuthlung Tharah

erawh chuan ‘*biang lehlama bêngtu hnênah chuan a lehlam pawh dawh rawh*’ tiin kan inzirtîr tawh thung.

Mi thenkhat chuan, “*Miin min tihnat chuan kan tina ve ngei tûr a ni. Min tih dân chu a natzia an hriat theihna tûrin eng kawng emaw talin kan bei lêt ve ngei tûr a ni,*” an ti thîn. A hun lai chuan hetiang a tih hi thil tha zâwka ngaih te pawh a awl thei hial. Mahse a ni hauh si lo. Kan chung a thil tha lo ti duhtute kan beih lêt hian, anmahni ang lekah kan insiam tihna a ni. Phuba chu Pathian lâk tûr a ni. Phuba rêng rêng la suh - Pathian lâkah dah mai rawh.

### **Non-judgemental attitude:**

Mother Teresa khân, “*Mi dangte nun i tehsak chhûng chuan anmahni hmangaihna hun i nei ngai lo vang,*” a ti a. Mi dangte hmangaiha tanpui tûr chuan an nun teh lo va, hmangaih an ngaih avânga hmangaiha, tanpui an ngaih avânga tanpui mai tûr a ni.

Mizote hian a hnam pum ang pawha kan mamawh tak chu *non-judgemental attitude* hi a ni âwm e. Mi dangte chu eng nge an niha, an nun hluiah eng nge an lo tih tawh tih ngaihtuahin kan buai fo thîn. Hei hian kan nun honaah boruak nuam lo a siam a, inrin loh tawwna a thlen phah nasa hle. Kan inthlîr a, kan inteh ru thêh a, ‘*Ani pawh*

*hmânah a chuti a khati tawh*’ tiin, mi dang pawh eng an nih bîk lohzia thu hi kan sawi tēuh thei zêl. Hei hian nun honaah harsatna nasa tak min thlen a ni.

Mi chu a dik famkim lo mai thei, a fel famkim hauh lo vang; mahse, teh khera **judgement** pêk kan lo tum thîn hi chu a fel lo a ni. Keimahni hi inteh thîn ila, mi dang chu anmahni inteh ve mai se, nun ho a nuam ang a, rawngbâwl ho a nawm phah baw ang.

Mihring chi hrang hrang - mizia leh pianphung, duh zâwng leh duh loh zâwng, lawm zâwng leh lawm loh zâwng inang lo ve tak tak, hmêltha leh hmêlchhia, zêi leh zêi lo, rethei leh haus, fîng leh mâwl te awm khâwmna khawvêlah hian a nung thiam thiam, dawhtheihna ngah ngah, mi dang laka beisei leh phût ngah lo apiang nun a nuam a ni mai.

Nangmah kha i duh khawp loh thîn mi dang angah khân han inchan chhin teh? I duh khawp bîk chiah em le? I duh khawp a nih chuan mi famkim i ni tihna a ni hial mai thei. Mahse, tu mah mi famkim an awm lo - Isua chauh lo chu.

Chuvangin, i duh khawp loh mihringte chu i duh khawp an nih hun ngâk lovin, an nih ang ang khân duh khawp mai rawh. Khawvêl famkim lovah hian nangmah leh nangmah ngau ngauva khawsa lova, nangmah leh mi dangte nêna nung ho tûra siam i ni tlat.



**Pu Lalruatfela**

*Central KTP Committee Member*

**HRUAITUTE**  
**Chanchin**



**P**u Lalruatfela hi Pu Kamzakhupa (L) leh Pi Lalhmunmawii (L) te fa tlum ber ni turin May 19, 1985 khan a lo piang a. Unau mipa 3 leh hmeichhia 1 a nei a ni. April 30, 2010 khan R. Lalfakzuali, Chaltlang nen inneiin fapa pahnih, Timothy Lalramengmawia leh Eleazar Vanlalenkawla te neiin Chaltlang Salem Vengah an khawsa mek a ni. A pa hnathawhna avangin India ram hmun hrang hrangah awm kualin, zirna pawh hmun hrang hrangah zirin, tunah hian Mizoram State Sports Council-ah a thawk mek a ni.

Phak ang tawka rawngbawlna ngai pawimawh mi a ni a, mahni kova tla mawhphurhnate chu hlen tlat tum mi leh mi dangte zai ngai taka rawngbawlpui tum tlat mi a ni. Tunah hian Inrinni zan thuhrlituah ruat niin, Sunday School Senior Department-ah Leader-in a awm a, Tleirawl chawhnu Inkhawmah Chairman a ni mek bawk. Branch KTP-ah ziaktu lo ni thin tawhin, Bial lamah sum vawngtu lamah a lo awm tawh thin a, kumin atangin Branch leh Bial-ah Ex-Officio-in a awm mek thung a ni.

Bible châng I Korinth 1:8  
“*Kraws thu chu boral mekte tan chuan atna a ni si a; keini chhandam mekte tan erawh chuan Pathian thiltihtheihna a ni zawk e*” tih thu hi a duh hle a. Tunlai khawvel danglam chak leh changkang tawh tak karah Kraws thu hi pawm a, vuan tlat turin KTP member-te min sawm a ni.

Pa fiamthu duh ve tak leh biang biak nuam tak ni mah se, ze zawi tak leh inkiltawih mi tak a ni thung. Infiamna lamah chuan Cricket leh Badminton hi khelh nuam a ti a, amah be duh tan Phone No. 9774611124-ah biak pawh theih reng a ni e.

**Pu F. Lalremruata**  
*Central KTP Committee Member*



**HURUAITUTE**  
**Chan Chin**


*F* Lalremruata hi Pu F. Lalrinawma leh Pi Biakthansangi te Fa pathumna niin July 12, 1985 khan Saron veng, Aizawlah a lo piang a, an unau hi hmeichhe pathum leh mipa pakhat niin mipa awm chhun a ni. Kum 2013 khan C. Lalrinsangi, Chaltlang nen innein fa pathum, hmeichhia pahnih leh mipa pakhat neinin Saron Vengah an khawsa mek a ni.

Rawlthar a nih atangin a phak ang tawkin rawngbawlina lamah a inhmang ve thin a. Youth For Christ-ah zirtirtu chanvo chelh chhovin KTP lamah te Group hruaitu a ni chho a, kum 2006-ah Branch Committee-ah tel chho in hemi kum vek hian Bial Zaipawl (2006-2010 term) ah te a tel a ni. Kum 2016-ah Branch Office Bearers-ah thlan tlin niin Leader, Asst. Leader, Secretary, Asst. Secretary post te a lo chelh tawh a, Bial KTP-ah kum 2019 atanga kum 2022 thlang Bial Office Bearers-ah Leader, Asst. Leader, Secretary, Asst. Secretary post te a lo chelh tawh baw.

Sunday Sikul lamah kum 2005-ah chanvo chelh tanin

Beginner, Primary, Junior, Intermediate Dept. ah te Leader leh Asst. Leader nihna te lo chelh tawhin hei bakah hian Inrinni zan kohhran inkhawm thuhrlitu a ni mek baw.

Rawngbawlina ngai pawimawh mi, mahni kova tla chu phak ang tawka hlen chhuah duh mi a ni a, Kohhran leh KTP inkaihhruaina a ngai pawimawh thin hle. Sam 37:5 ***"I awm dan tur chu Lalpa chungah ngath la; amah chu ring la, aman a ti vek ang."*** tih hi a Bible chang inngahna a ni. Amah hi Maruat, Maa tiin an ko thin. Mi fiamthu duh leh thenrual ngaina tak, kawm nuam tak a ni. Amah be pawp duh tan phone **9436362544**-ah a biak theih reng a ni.



## HRINGLANG TLÁNG

**M**inathum - Jerry Falwell, Oral Roberts leh Bob Jones  
te chu Russia ramah Bible a rukin an thaw'n lut  
thin a, tum khat chu vanduaithlak takin Russian-  
hoin Bible an thaw'n luh thin chu hriain an man a, a mantute  
chuan "Thu hnuehnung sawi duh in nei em?" tiin an zawt  
theuha.

Jerry Falwell chuan,  
"America hi ka hmangaih a,  
ka ram tana ka thih chuan ka  
lawm hle ang," a ti a. Oral  
Roberts chuan, "Vawiinah  
hian ka nunna ka chan ta a  
nih pawhin ka tana thil tha  
zaw'k a ni ngei ang," a ti ve  
thunga.


Bob Jones chuan, "He laia  
mi sual tangrang pahnih hlat  
deuhah hian, a falin min  
khaihlum ang che u," a ti  
thunga.

Kan thil tih chhan hi a  
inang lo thei khawp mai. Thil  
tha ti theuh theuhah pawh  
hian kan tih chhan hi inang  
lo tak a ni thei. Pathian  
rawngbawl emaw kan intih

lai ngei pawh hian a rawng  
hi kan lo bawl miah lo thei  
baw'k.

Mahni In lumah pawh  
awm hman lo leka kan KṚP  
em em lai hian KṚP neitu  
hian a rawngbawl min ti ve  
angem? Rawngbawl na neitu  
rawngbawl hauh loa bawl ve  
riau emaw in tih palh hi thil  
hlauhawm tak a ni.  
Chuvangin, kum 2023-ah  
hian kan tih chhan zawng  
zawng hi kan Pathian tan lo  
ni zel teh se.

In tih apiang chu mihring  
tan anga ti lovin, Lalpa tan  
anga ti zawkin, chāk takin ti  
rawh u; Lalpa Krista rawngin  
bawl a nih hi (Kolossa 3:24).



## KANTU CHAWNGTLAI BRANCH

Chawngtlai Pastor Biala bial thut hmun Kristian Thalai Pawl, Chawngtlai Branch hi ni 11.1.1959 khan din a ni a, 2019 khan Diamond Jubilee hlim takin an lo lawm tawh a, Tunah hian member mipa 223 Hmeichhia 112, an vaiin 335 an awm mek a ni. Kristian Thalai hi Copy 80 an la mek bawk.

An Branch aṭang hian Missionary pariat (8) an chhuak tawh a, Missionary hi Synod Mission Board kaltlangin paruk (6) an chawm mek a ni. Pastor hi pahni (2) an chhuak tawh bawk a, an branch OB lo ni tawh aṭangtein Pastor leh Missionary chhuak an nei a ni.

Sub-Committee hrang hrang 7 an din a, hei hi Branch tha tichaktu pawimawh tak a ni. Tin, Group pali (4) ah an inṭhen a, Group Budget hi ₹ 13,000 niin Group thum (3) hi khaw chhunga awmte group a ni a, Group khat hi khaw pawna awm te group a ni a, hmun danga zirna leh eizawna avanga awmte tana Group siam hi Kohhran leh KṬP-ah an neitu phah em em a, hlawk an tiin Group hi an siam/ din lo phal tawh lo a ni. Budget hi khaw

chhunga awmte aiin an tuk tlem ṭhin a ni.

An Branch Budget chu ₹ 4,50,000 a ni a, Sum thawh chhuahna hi Group Budget, inkhawm thawhlawm leh Faith Promise te bakah Quarry te neiin lung la leh Slab chung te, VC hnuaiah te an inhlawh nasa ṭhin em em a, kum khat (1) chhungin vawi 20 chuang fe te hnattlangin an thawk ṭhin a. Hnatlang kim leh hnattlang tam lawmman siam hi branch-in tihphung nghetah an nei a, hnattlang secretary a hranpaa nei thlap ṭhin an ni a, hnattlang lawmman ṭha tawk tak an pe ṭhin bawk. Kum 2023 Project zinga lian ber Work Camp nei turin an inbuatsaih mek a ni.

Pathian khawngaihna azarah CKṬP leh Bial KṬP aṭanga tih tur leh mawhpurhnate a hun takah an la hlen zel thei a ni.

# Keimahni



- **Kum 2022 chhunga Kristian Thalai la tam Branch 10-te:**

|                        |                                |
|------------------------|--------------------------------|
| 1. Venghnuai - 748     | 2. Mission Vengthlang - 706    |
| 3. Ramhlun North - 651 | 4. Electric Veng - 596         |
| 5. Republic Veng - 551 | 6. College Veng (Aizawl) - 549 |
| 7. Mission Veng - 499  | 8. Aizawl Branch - 412         |
| 9. Tuikual - 410       | 10. Venghlui - 354             |
  - January ni 17, 2023 zan khan **Khatla Pastor Bial KTP Silver Jubilee** lawmna hmanpuin T. Upa TC Lalremsiamah leh Committee Member dangte an kal.
  - January ni 20, 2023 khan **‘Steering committee for Mizoram State HIV/AIDS Meeting’** ah Tv. Rinsailova Sailo, Committee Member chu CKTP aiawhin a tel.
  - January ni 26, 2023 khan **Leadership Training** neihpuin T. Upa Lalbiakthuama leh Pu Lalnunsanga, Committee Member te Leitan South Branch-ah an kal.
  - January ni 29, 2023 khan T. Upa Robert Lalrinawma, Comt. Member chu Ramthar Vengthlang Kohhran Upa atan thlan tlin a ni.
  - January ni 30, 2023 zan khan **Phunchawng Branch KTP kum 25-na, Silver Jubilee** hmanpuin T. Upa PC Vanlalnunmawia, Treasurer, Pu Lalruatfela, Committee Member leh Mizoram Synod Choir-te an kal.
  - January ni 31, 2023 khan **Central KTP Committee** wawi 760-na Committee Room-1, Synod Office, Aizawlah neih a ni.
  - **YRC Phase-1, Tawngtai Bethel-na** hmun hmangtu pawh kan tam ta hle a, nikum 2022 chhunga hmangtu kan neih dan official record hetiang hi a ni (Br /pawl/ group ang zela dahin) :
 

|                       |                           |
|-----------------------|---------------------------|
| 1. Branch KTP - 142   | 2. Kohhran Hmeichhia - 17 |
| 3. KPP - 14           | 4. Kohhran Pawl dang - 10 |
| 5. Ministry/ Team - 8 | 6. Thianho - 5            |
| 7. Masihi Sangati - 4 | 8. Video Shooting - 3     |
- Mipui kal chhinchhiaah zawng zawng belkhawm - 9767**



KANTU : CHAWNGTLAI BRANCH

## CENTRAL KTP HRUAITUTE 2022-2024

### Office Bearers

|                 |   |                          |            |
|-----------------|---|--------------------------|------------|
| Leader          | : | Rev. Dr. F. Pachhunga    | 9717371338 |
| Asst. Leader    | : | Pu LV Lalthantluanga     | 8974007486 |
| Gen. Secretary  | : | Upa Lalmuanpuia          | 9436142398 |
| Asst. Secretary | : | Upa Johny Lalawmpuia     | 9612587039 |
| Treasurer       | : | T. Upa PC Vanlalnunmawia | 7005885494 |
| Fin. Secretary  | : | Upa F. Zohertiana        | 9862846187 |

### Committee Members

|                          |            |                             |            |
|--------------------------|------------|-----------------------------|------------|
| Tv. Malsawmdawngliana    | 9862344764 | Pu Jonathan Lalhruaitluanga | 8131984506 |
| Tv. Vanromawia           | 9612215741 | Pu Lalrempuia               | 9862857357 |
| Upa Lalchharmawia        | 8014445696 | Pu K. Lalfakzuala           | 9436733838 |
| Pu H. Rosangzuala        | 7005283942 | Tv G. Lalbiakmawia          | 8794198948 |
| Pu Lahnunsanga           | 8014415097 | T. Upa Lalbiakthuama        | 9862114383 |
| T. Upa Robert Lalrinawma | 9862365583 | Pu R. Lalmalsawma           | 9862420406 |
| Tv Rinsailova Sailo      | 9862327187 | Pu Lalruatfela              | 9774611124 |
| Pu F. Lalremruata        | 9436362544 | Tv PC Lalthanmawia          | 8014697370 |
| T. Upa TC Lalremsiamia   | 9612777977 | Pu C. Lalkhawngaiha         | 9774638471 |
| Pu Rossi Lallawmawma     | 9062145940 | Pu C. Ilmingthanzaupa       | 9436190767 |
| NI. T. Lallianzuali      | 9774764394 |                             |            |

Tv. Lalringgheta (Asst. Coordinator i/c KTP, Synod Office) - 9856804149

### Ex-Officio Members

|                               |                               |
|-------------------------------|-------------------------------|
| Rev. Dr. C. Chawngghmingliana | - Synod Moderator             |
| Upa B. Lalhmunliana           | - Synod Secretary (Sr.)       |
| Rev. Dr. K. Lallawmzuala      | - Executive Secretary ic/ KTP |

## KTP KUMPUAN THUPUI 2022-2023

### 'Sual tinreng bul - Tangka sum ngainat'

*Tangka sum ngainat hi sual tinreng bul a ni si a; chu chu thenkhatlen an awl a, rinna chu an kal bosan a, anmahni leh anmahni lungngaihna tam takin an inchhun tlang ta chuk a.*  
(1 Timothea 6:10)



Postal Regn. no. MZR/116/2021 -2023 RNI  
No. MIZMIZ/2009/29074



SBI Payments



EP-ink  
SBI Pay  
SHIM LPI

MERCHANT NAME: KTP

UPI ID: KRISTIANTHALASBI

## BIAL CONFERENCE A HRUAITUTE CHHUAHNA



CHHINGCHIP MUALPUI BIAL



VATHUAMPUI BIAL



KAWLKULH NORTH BIAL



CHERHLUN BIAL



NGOPA BIAL



HMAWNGBU BIAL



KAISANARY BIAL



NE KHAWDUNGSEI BIAL



MUALLUNGTHU BIAL



SERCHHIP BIAL

Printed and Published by Upa Lalmuanpuia, Synod Office, Mission Veng on behalf of Christian Youth Fellowship  
Edited by Malsawmdawngliana and printed at Synod Press, Mission Veng, Aizawl, Mizoram. Copies - 43,000